

**TPM: Rakyat Sgor 'terseksa' bawah Pakatan
Malaysiakini.com
September 23,2011**

Timbalan Perdana menteri Tan Sri Muhyiddin berharap masyarakat Selangor memilih BN dalam pilihan raya akan datang setelah rakyat kini didakwa "terseksa" bawah Pakatan Rakyat.

Katanya, beliau diberitahu demikian oleh seseorang ketika tiba di majlis penutup program permukiman wakil rakyat BN di sebuah sekolah di Meru petang ini.

"(Orang tersebut kata) saya nak cepat-cepat pilihan raya nak pergi mengundi sokong BN, sebab rasa terseksa duduk bawah Pakatan di Selangor.

"Sorrylah berkempen," katanya lagi yang cuba melunakkan suasana dalam ucapannya di sekolah SMK Meru, Klang itu.

Beliau yang juga menteri pelajaran turut mengumumkan peruntukan sebanyak RM29 juta untuk sekolah berkenaan.

Peruntukan berkenaan adalah untuk membina sebuah sekolah baru bagi menampung jumlah pelajar di SMK Meru, katanya.

Seronok sepanjang hayat

Muhyiddin juga berkata BN akan terus menyalurkan bantuan kepada rakyat walau Selangor berada di bawah Pakatan.

"Kita tidak mahu Selangor walau dipimpin Pakatan, pembangkang akan biarkan nasib rakyat tidak terbela," katanya lagi dalam program yang turut dipakej sebagai majlis sambutan hari raya itu.

Beliau turut memuji program anak angkat yang dijalankan Kelab ADUN BN Malaysia (BNBBC), di mana seramai 170 orang wakil rakyatnya menginap di rumah penduduk setempat sehingga permukiman itu berakhir hari ini.

Katanya, penduduk yang mengambil bahagian dalam program berkenaan tidak akan lupa dan akan berasa seronok sepanjang hayat.

"Bila sampai pilihan raya, dia tak fikir sangat pun, dia pangkah BN," katanya.

Turut hadir di program itu ialah pengerusi BNBBC, Datuk Nadzri Ismail dan juga ADUN Meru, Dr Abd Rani Osman.